

■ CINE A GLEMONE

Cuant che la pelicule e fevele par furlan

Eje in cors la rassegne cinematografiche in lenghe furlane curade dal Comun di Glemone - Sportel sorecomunâl pe lenghe furlane dal Glemonàs, in colaborazion cun La Cineteca del Friuli e l'assoziazion Auser, e cul finanziament de Agenzie Regionâl pe Lenghe Furlane (www.arlef.it). Dopo lis primis seradis dai 5 cun 'Cjampanes' di **Stefano Marzona** e **Anna Maria De Monte** e dai 12 'L'amôr... une volte.

"Alla scoperta della nostra memoria" di **Luigi Stefanutti** e **Michele Federico**, l'apontament par miercus ai 19 di Novembar al sarà cun 'Prime di sere' dal 1993, il film di **Lauro Pittini**, ispirât dal romanç di **Carlo Sgorlon** e vincidôr de tierce edizion de Mostre dal Cine Furlan. Lis proieziions a son in program ogni miercus fint ai 10 di Dicembar dal 2014 aes 20.30 li dal Cine teatri sociâl di Glemone. Par informaziions: Sportel sorecomunâl pe lenghe furlane dal Glemonàs, lunis e martars, des 9 aes 13; tel. 0432.973234.

SCOLTADIS DI DRIUS

Pocje memorie

Chel ch'al bêf par dismenteâ, di sigûr, prèst o târd, al finarà cul dismenteâsi ancje di bevi.



Al è tacât il progjet inmaneât de Societât Filologjiche Furlane, inte suaze des propuestis pe scuele, che al previôt dute une schirie di ativitâts pes primariis e secundariis inferiôrs. >> DI ANDREA TOMASIN

Cuatri lenghis une Regjon

Fâ cognossi ai frutins e ai zovins il patrimoni lenghistic dal Friûl Vignesie Julie e la ricjece che e nas dal imparâ tantis plui lenghis e culturis, par cognossi miôr la nestre identitât, rinfuarcî la specialitât di un teritori unic indulâ che la varietât lenghistiche e je di simpri stade presente, jessi pronts al confront cul forest.

Chest e inmò di plui al è l'obietîf di 4 Lenghis une Regjon, la propueste inmaneade de Societât Filologjiche Furlane cul jutori de Regjon, inte suaze dai progjets

speciâi pe scuele di chenti. Dongje de Filologjiche, a fasin part de rêt di scuelis che a sostegnin la iniziative ancje ju Istitûts Comprensîfs II e III di Udin, Tavagnà e Martignà.

INDENANT FIN AE FIN DAL AN

Il progjet al larà indenant fin ae fin dal an e al previôt la realizazion di dute une schirie di ativitâts pes scuelis primariis e secundariis inferiôrs.

A son stâts organizâts nuie

mancul di 45 incuintris tai istitûts primaris e secundaris inferiôrs indulâ che a vegnin presentadis in maniere semplice, che i fruts a puedin capî, lis cuatri comunitâts lenghistiche de nestre regjon: no dome duncje la furlane, ma ancje la todesce e la slovene dongje di chê taliane.

Cun di plui, i frutins a podaran fâ propris lis cognossincis cjadadis sù cun chescj laboratoris e aprofondîs ancje in grazie di un librut plurilengâl che al presente lis specialitâts des lenghis de nestre regjon, i alfabet e une tabele cu lis peraulis plui dopradis tal fevelâ di ogni dî. Chest librut al è stât editât de Filologjiche e al vignarà dât fûr tes scuelis. I materiâi a restaran a disposizion di ducj e si podaran ancje discjamâ dal sît internet www.filologica-friulana.it.

CORS DI INZORNAMENT

Par finî, il progjet 4 lenghis une Regjon al previôt ancje cors di inzornament par docents, cors che a frontin il teme de identitât lenghistiche regjonâl: in ceste maniere si ponte a sensibilizâ e formâ dut il mont de scuele e no dome i arlêfs. A son pene tacâts i cors di lenghe furlane e di musiche e a son par partî chei di tradiziions populârs dal Friûl (cun vinars ai 7 di Novembar) e di lenghistiche (cun martars ai 11 di Novembar). La sede dai cors, sore nuie e vierts a ducj, tignûts di docents cualificâts, al è Palaç Mantica, cjase de Filologjiche in vie Manin 18 a Udin; ogni percors al dure 15 oris e a al è ricognossût tant che titul culturâl par sedî inserîts te liste regjonâl dai insegnants cun competencis di lenghe furlane.



ilfriuli@ilfriuli.it

Eje in vore a la Fiere di Udin, a Tore-an di Martignà, Idee Solidarie, un apontament zaromai fis, a scjadince anuâl, pal setôr des Politichis sociâls de Provincie di Udin. Chest an e cole la diesime seste edizion de iniziativa - e fas presint la assessore provinciâl a lis Politichis sociâls Elisa Battaglia -, indreçade a dâ visibilitât e fâ cognossi il sfuarç de Amministrazion tal cjamp de solidarietât, in particolar intes areis che rivuardin lis personis disabilis.

L'event al viôt la presince di 20 realtâts dal mont dal volontariât e de cooperazion sociâl dal teritori, che a àn volût dâsi dongje e puartâ un segnâl di vitalitât. Par ducj i citadins si trate - e va indevant l'esponent di palaç Belgrât



Elisa Battaglia

assessore provinciâl a lis Politichis sociâls

L'impegn sociâl de Provincie a Idee Solidarie

- di une ocasion no dome par comprâ cjossis fatis a man, a chilometris zero, indreçadis a tignî sù ativitâts solidarîs, ma ancje, e forsît soredut, di incuintrâ personis e cognossi realtâts e esperiençis di vite difilicis che a àn savût creâ stradis di sperance.

"La crisi e il pat di stabilitât no nus àn dât la pussibilitât di sostignî ceste manifestazion come tai agns passâts e tal mût che o varessin volût - è precise la Battaglia -, dut cûs la Amministrazion provinciâl e à volût invistî in chest prog-

jet, che e à fat nassi e viodût cressi tai agns. O ringracii lis realtâts dal Tierç setôr che a àn decidût di dâsi dongje a Idee Solidarie 2014, par testimonêncie ancje in chest lûc che la solidarietât e à simpri di vè un puest tai pinsîrs de int; che il Nadâl, che al rive in curt, nol è consumisim, ma condivison e atenzion a chei che a fasin plui fature.

Idee Solidarie, rassegne promovude e tignude sù de Provincie di Udin jenfri la mostre di Idee Nadâl, e sierarà domenie ai 16 di Novembar.